



Naan Eo an H.E. David Kabua non Armij in Majol 12 August 2022

Iakwe komwoj aolep!

Ikonan bok ien in im lewaj melele ko rekaal tata kin naninmij in COVID-19 einwot an kar jino ajeded jen Monday eo kio ilo week in. Mene jekar jab lukkun jela ta enaj kar walok im ewi wewen ad maron kate kij ilo jeppo ran kein maantak. Jekjek in jej ione rainin ejelok oktak jen jekjek ko im lol ko jet ibelakin lol in emoj air bar jelmae im enjake nilitookin kij in. Jemaron in ba ke kio emoj ad kajutak elon jikin kakolkol im takto ko rejenolok jen jikin ejmour ko relap ak Alternate Care Sites ko non armij ro ad ilo Majuro im Ebeye jimor. Kajojo ran kein ilo ad kate kij im jelmae wewen in, inem ekomon bwe jen kajurlok im lablok ad maron in tarinaik jekjek in ejelmae kij rainin.

Ij rejan aolep armij non air ronjake wot kabilok ko jen ro retijemlok ilo jermal in ejmour elane emoj loe ke koj positive. Jikin Ejmour eo ad ewor uno ko ie non armij ro im remaron mojno jen kij in non jiban ir bwe en jab lablok air drolel im lukkun naninmij. Uno kein emoj an FDA eo an America kotlok im komelim ad kojerbali im emoj loe bwe elab air lukkun in jiban im elab ao monono im ba ke elon wot ian armij rein ad emoj air jino bok uno kein im emoj air jino mour jen kij in im eman air mour.

Ikonan kamolol elon armij im drolul ko im rar monono in letok peir im jiban Kien eo ad ilo tarinae in nae naninmij in. Elon armij jen elon kajojo jekjek im rebeltan mour jimor ilo public im private sector ko rar maron in jiban tok kij bwe armij rein ad jen maron in kejbarok ir im ejmour ko air. Ilo mol emoj an jino itok jiban jen elon lol ko im armij ro mottad jen belaki n lol in. Emoj an itok jet menin jiban ikijen uno jen jet ro jeid im jatid jen FSM im American Samoa im rainin emoj an tokektok jen Taiwan kein bobrae ko naetair PPEs. America ej kio bojak in jilkintok dri kapeel ro air jen CDC non Majuro im Ebeye im renaj itaktok ilo jinoin week in ej bedotok koba jet Doctor ro jen Taiwan, WHO im UNICEF non air itok in jiban team in takto ro ad.

Emoj an jino ejak juon Plan non jino jiban neighboring island ko ilikin non keboj ir im lale bwe en ilok kein kakolkol ko an Covid-19 koba kein kejbarok ko non bobrae kij in. Bareinwot ewor team ko jen Jikin Ejmour eo rebojak in ilok non ene kein non boklok menin jiban ko.



Ilo tore in kotebar eo elab in kio ej non ad kajeon kabwijrake an lablok an ajeded kij in . Einwot an jabwe peid ilo elon wewen ko, inem emoj ad kajitok lok jiban non ro mottad im jerar ijoko jabdewot ibelakin lol in.

Ilo ran eo inne ekar wor ebakelokk 500 case ko ilo Majuro im ilo Ebeye 29. Im iburomij in ba ke ewor 2 mij ilo Majuro in jej kobalok ilo tiriamo iben baamle kein. Ikijen neighboring island ko, emoj an itok melele ke ewor 2 confirmed positive case ilo Wotje.

Kin menin, ij kajitok karejar iben aolep armij bwe jen ronjake im bokake aolep kabilok ko jen Kien im jab kijor in etal non ene ko ilikin ijellokin wot jen Majuro non Kwajalein im jen Kwajalein non Majuro. Ilo an emakitkit armij, kij ne ej bareinwot emakitkit.

Mekarta ran kein jej watoki reaetok im bin kio ak ejab etto jenaj bar rol non jekjek ko kar mokta. Jouj im jab bwijrak jen ami konak mask ko im wonmanlok wot im jiban im lale im kautiej ro jet. Kememij bwe Covid ne ej dreton waj ilo enbwinim ilo am emenono kin botum im lonin im elab an aurok bwe kwon kanok aolep ien otemjej mask eo am. Im en lukkun tiljek am kwal peim.

Kojerbal JOUJ eo im ejja mottan wot manit im mour kein ad non kokajur im rie kap erloke peid im jiban ro rej lelnon. Ewor kejatrikrik. Im ewor kajur elab ibed elane jenaj likit ad tomak ilo Anij im kolablok ad jermal iben dron im Drijo im Ukoj non bukot mejlan elon ian issue kein rebbin im jej bojak in jelmae einwot juon lol.

Eliktata emoj an Cabinet eo kwalok ke aelon kein emoj ad bed ilo State of Health Disaster im jej kejatrikrik ke enaj itok elon jiban ko jen belakin lol in.

Kom kanuij in emool im Anij en kojeramon Marshall Islands.